

21 JAN 2003

Mahathir-Program/I

DR MAHATHIR LAKUKAN LAWATAN KERJA KE MESIR

Oleh: Muin Abdul Majid

KAHERAH, 21 Jan (Bernama) -- Aturcara yang padat termasuk mengadakan perbincangan dengan Presiden Mesir Hosni Mubarak menanti Perdana Menteri Datuk Seri Dr Mahathir Mohamad dalam lawatan kerja tiga harinya ke Mesir.

Dr Mahathir dan isteri Datin Seri Dr Siti Hasmah Mohamed Ali dijadualkan tiba di Lapangan Terbang Antarabangsa Kaherah pada 7.30 malam (waktu tempatan) Selasa (1.30 pagi Rabu waktu Malaysia).

Pada Rabu, Perdana Menteri dijadualkan menemui rakan sejawatannya Dr Atef Muhammad Muhammad Ebeid sebelum mengadakan perbincangan dengan Mubarak di Ibu pejabat Presiden di Heliopolis.

Dr Mahathir juga akan diraikan oleh Mubarak dalam satu jamuan tengah hari di mana kedua-dua pemimpin itu akan disertai isteri masing-masing Dr Siti Hasmah dan Suzanne Mubarak.

Perdana Menteri turut dijadualkan menemui Ulama Besar Al Azhar, Dr Mohammad Sayed Tantawi di Mashyaket Al Azhar.

Para cendekiawan dan ahli akademik antarabangsa akan mendengar apa yang akan Dr Mahathir katakan mengenai keadaan masyarakat Islam apabila beliau menyampaikan syarahan bertajuk "Perpaduan Islam dalam Menghadapi Cabaran dan Ancaman" di Universiti Al Azhar. Ini akan disusuli dengan sesi soal jawab dengan para peserta.

Pada petangnya, Dr Mahathir dan Dr Siti Hasmah akan melawat sekitar Kaherah sambil menyusuri Sungai Nil di mana mereka akan diraikan dalam satu jamuan malam oleh Duta Malaysia di sini, Datuk Abu Bakar Daud.

Dalam lawatan kerjanya itu, Perdana Menteri akan diiringi oleh Menteri Luar Datuk Seri Syed Hamid Albar, Menteri Besar Perlis Datuk Seri Shahidan Kassim, Penasihat Agama kepada Perdana Menteri Tan Sri Abdul Hamid Othman, Mufti Kedah Datuk Sheikh Hasbullah Abdul Halim, Mufti Perlis Datuk Mat Jahaya Husin, Mufti Johor Datuk Sheikh Nooh Gadot dan Timbalan Mufti Kelantan Datuk Shukri Mohamad.

Perdana Menteri akan berlepas dari Kaherah pada 8.30 pagi (waktu tempatan) Khamis (2.30 petang waktu Malaysia) ke Switzerland di mana beliau akan menghadiri Forum Ekonomi Dunia di Davos.

Kali terakhir Dr Mahathir mengunjungi Mesir ialah pada 2000 sempena Sidang Kemuncak G-15. Beliau mengadakan lawatan rasmi ke negara ini pada 1998.

-- BERNAMA
MAM AHH NAK